

Uunga siunnersuut: Erngup nukingata innaallagissiornermut atorneqartarnera pillugu Inatsisartut inatsisaat nr. x, x. [qaammat] 2014-imeersoq

(Avatangiisinut Pinngortitamullu Naalackersuisoq)

Saqqummiussissut

(Avatangiisinut Pinngortitamullu Naalackersuisoq)

Siullermeerneqarnera

Matumuuna erngup nukingata innaallagissiornermut atorneqartarnera pillugu inatsisissatut siunnersuut saqqummiutissavara.

Inatsisissatut siunnersuummi erngup nukinga atorlugu suliassanut inuussutissarsiornermi aningaasaliisarnerit siuarsarneqarnissaat pingaarnertut siunertarineqarpoq.

Inatsisissatut siunnersuut piareersarluakkamik suliaqarnermik aallaaveqarpoq. 2012-imi upernaakkut ataatsimiinnermi inuussutissarsiornermi suliassanik angisuunik piviusunnngortitsinissamut atugassarititaasunut killissaliussat pillugit nassuiaat Inatsisartunit suliarineqarpoq. 2012-imi ukiakkut ataatsimiinnermi Alcoa Inc.-imut isumaqatiginninniarnertit ingerlaqqinnissaannut aalajangiiffigisassatut siunnersuut nr. 113/UKA 2012 Inatsisartunit akuerineqarpoq.

Pineqartuni marlunni taakkunani erngup nukinga atorlugu suliassanut sinaakkutissanik pitsaanerusunik pilersitsinissaq annertuumik isumaqatigiissutigineqarpoq.

Siunnersuummi allannguutissat pingaarnertit tassapput:

Atuinissamut akuersissutit atunnerisa siviunerpaaffissaat ukiunik 20-nik sivitsorneqassaaq, taamaalilluni atuinissamut akuersissutit atuuffissaa ukiunik 80-inik siviussuseqalersinnaalluni. Tamatumali peqatigisaanik maluginiaqquneqarpoq, atuinissamut akuersissutit atuussinnaanerisa siviussusissarpiaannut Naalackersuisut akuersissuummi aalajangersaasarnertit ingerlaannassammat. Tassalu piffissap siviussusissaa suliassaq, aningaasaliissutaasut amerlassusaat aammalu pisinnaatitsissummik pigisaqartup aningaasaliissutaasa naammaginatut erniortinneqarnissaat tunngavigalugit – ullumikkutut – aalajangersarneqartassaaq.

Nutaatut pisinnaatitsissummik pigisaqartup qanoq annertutigisumik kalaallit suliffeqarfiinik atuinissaannut nunaqavissunillu sulisoqarnissaannut Naalackersuisut aalajangersaasinnaanerannut periarfissamik pilersitsisoqassaaq. Inuiaqatigiit erngup nukinganik sulianit pissarsiarisinnaasaasa amerlisinnissaannut tamanna pingaaruteqarpoq.

Tamatuma saniatigut aamma erngup nukinganut inatsimmi 2009-meersumi allassimasut ersernerluttut arlallit ersarissarnissaat siunnerfigineqarpoq. Tassalu inatsisissatut siunnersuummi inatsisitigut tunngavissat nassuiarneqarneri pillugit Naalackersuisut pisinnaatitsissummillu pigisaqartup akornanni siunissami isumaqatigiinngissutinik aaqiagiinngissutinillu pilersoqannginnissaa akiornarneqarpoq.

Siunnersuut aamma suliassaqarfinni arlalinni inatsisitigut tunngaviusunik atuuttunik ingerlatitseqqinnissamik kinguneqassaaq. Tassalu matumani inatsimmi sinaakkusiussat, erngup nukinganik sulianut assigiinngitsunut atuuttut ingerlaqqinnissaat pineqarpoq.

Inatsisissatut siunnersuummi – nalunaarutit, akuersissutinut najoqqutassat aalajangersimasunullu akuersissutit aqutugalugit – suliassanut ataasiakkaanut sukumiisunik maleruagassiornissamut akuersissuteqarnissamullu atugassarititaasusannik aalajangersaanissamut Naalackersuisut piginnaatinneqarput.

Tassalu siunnersuummi isumannaallisaanerup eqqarsaatigineqarnera, avatangiisit mianerineqarnerat aammalu inuiaqatigiinni piujuartitsisussamik ingerlanissap eqqarsaatigineqarnera aallaavigalugit tamakkiisumik isiginnittumik aallaaveqarnerup qulakkeerneqartaannarnissaa siunertarineqarpoq.

Taamatut oqaaseqarlunga oqallittoqarluarnissaa kissaatigaara.